

PAGTULON-AN 16 – PAGESIMANG NGADTO SA PAGKABIHAG

Mga Hari ug mga Cronicas

TEMA: Pagpakita nga ang tinuod nga kalipay muabut lamang kon kita nakaila ug motuman sa Dios.

Unsa ang kalainan tali sa pagkamatinumanon ug sa pagkadili matinumanon? Kon kita motuman, atong gibuhat ang mga gitudlo kanato nga buhaton. Kon kita dili motuman, kita naglapas, nagsupak ug nagpakyas sa tugon o sugo.

Unsa ang kalainan tali sa pagkamalipayon ug sa pagkadili malipayon? Ang kalipay mao ang pagbati sa kadasig kon kita nakapahimulos ug maayong mga butang. Ang dili kalipay mao ang kasukwahi niini. Magmalipayon ba kita kon kita dili matinumanon? Dili, tungod kay aduna kitay sad-an nga tanlag; ug usab ang pagkadili matinumanon kanunay magadala ug silot, dili lamang ngadto kaniya nga naghimo sa sayop, apan ngadto sa uban usab.

Sa diha nga si Jehova nagalig-on sa mga kabalaoranan ug mga tuluman-on ug mga sugo pinaagi kang Moises, didto sa Bukid sa Sinai tali sa Iyang kaugalingon ug sa mga anak sa Israel, Levitico 26:46. Siya miingon kanila nga kon sila magalakaw sa Iyang mga kabalaoranan ug magabantay sa Iyang mga kasugoan; Siya magahatag ug ulan sa ilang panahon, Levitico 26:3-4. Siya magahatag usab ug kalinaw sa yuta ug pagakuhaon ang mga dautan nga mga mananap gikan sa yuta. Sila magalutos sa ilang mga kaaway ug mangahulog sila pinaagi sa espada, Levitico 26:6-7.


Apan kon sila, magasalikway sa Iyang mga kabaloranan ug ang ilang mga kalag magatamay sa Iyang mga tuluman-on sa dili pagbuhat sa tanan Niyang mga sugo, ug magsupak sa Iyang mga tugon; kining mga mosunod maoy buhaton ni Jehova kanila: Siya magapadala kanila ug kalisang, tesis ug hilanat nga magaut-ot sa mga mata ug pagasakiton ang mga kalag. Magapugas sila nga kawang lamang sa ilang binhi, ang ilang kaaway magakaon niini. Ug igabutang Niya ang Iyang nawong batok kanila ug mangasamad sila atubangan sa ilang mga kaaway, ug ang mga nagadumot kanila magapakaagalon kanila ug mangalagiw sila walay bisan kinsa nga magalutos kanila, Levitico 26:14-17.

Si Haring Solomon nakahibalo sa mga sugo sa Dios apan siya nagasupak niini. Siya nahigugma sa daghang lumalangyaw nga babaye gikan sa mga kanasuran nga niini si Jehova nagasulti sa mga anak sa Israel, “Dili kamo makigkauban kanila, bisan pa sila moanha kaninyo, kay sa pagkatinuod sila magaliso sa inyong mga kasingkasing sa pagsunod sa ilang mga dios.” Si Solomon miipon niini diha sa gugma. Siya adunay pito kagatus (700) ka mga asawa, mga princesa, ug tulo kagatus (300) ka mga puyo-puyo, ug sa dihang natigulang na si Solomon, ang iyang mga asawa nakapaliso sa iyang kasingkasing pagpanunot sa laing mga

dios ug ang iyang kasingkasing wala mahingpit diha kang Jehova nga iyang Dios, sama sa kasingkasing ni David nga iyang amahan, 1 Hari 11:1-4.

Si Jehova nasuko ug miingon ni Solomon, “Tungod kay kini imong nabuhat, ug ikaw wala magtuman sa Akong tugon ug sa Akong mga kabalaoranan nga Akong gisugo kanimo, sa pagkatinuod gision Ko ang gingharian gikan kanimo,” 1 Hari 11:11. Si Jehova nagapatindog ug mga kaaway ni Solomon ug usab usa ka tawo nga ang ngalan si Jeroboam mipataas sa iyang kamot batok sa iyang hari, 1 Hari 11:26. Si Solomon mihari sulod sa kwarenta (40) katuig didto sa Jerusalem ibabaw sa Israel ug sa dihang namatay siya, ang iyang anak nga si Rehoboam nahimong hari, 1 Hari 11:42-43.

Human sa kamatayon ni Solomon, si Jeroboam mibalik gikan sa Egipto, diin siya mikalagiw gikan sa atubangan ni Haring Solomon. Ug si Jeroboam ug ang tibuok katilingban sa Israel nakigsulti kang Rehoboam nga nagaingon, “Ang imong amahan naghimo sa among yugo nga mabug-at; busa karon himoon mo ang mapintas nga paghari sa imong amahan, ug ang iyang mabug-at nga yugo nga iyang gibutang kanamo nga magaan-gaan, ug kami magaalagad kanimo,” 1 Hari 12:2-4. Si Rehoboam miingon, “Ang akong amahan naghimo sa yugo nga mabug-at, apan ako magadugang sa inyong yugo,” 1 Hari 12:14. Ang Israel mialsa ug ang gingharian nabahin ngadto sa amihanang bahin, ang gingharian sa Israel, ug sa habagatang bahin, ang gingharian sa Juda, 1 Hari 12:16-20.



Tinubdan: Sweet Publishing – kini ilustrasyon lamang sa 2 Hari 25:7

Si Jeroboam nahimong unang hari sa amihanang bahin, ang gingharian sa Israel. Siya nakasala ug daku ug ang tanang mga hari nga nanagsunod kaniya misunod usab sa iyang mga lakang. Sa katapusan, sumala sa gipanagna ni propeta Oseas, ang Dios mipadala sa gisaad nga paghukom: ang kasundalohan sa Asiria miabut sa pagpakiggubat sa Samaria sulod sa tulo (3) katuig ug nagdala kanila nga binihag ngadto sa yuta sa Asiria. Kini nahitabo tungod kay ang mga anak sa Israel nakasala batok ni Jehova nga ilang Dios, 2 Hari 17:1-7. Imong makita ngano nga ang DALAN SA GINGHARIAN didto sa atong mapa, miliko karon tungod kana sa sala.

Sa gingharian sa Juda, kasagaran sa mga hari nga nagsunod kang Rehoboam mga dautan usab. Aduna lamay pipila nga nagabuhat ug maayo sa panan-aw ni Jehova.

Usa kanila mao si Ezechias kinsa nakighiusa kang Jehova. Wala siya mobiya sa pagnunot kaniya, kondili nagabantay siya sa iyang mga sugo nga gisugo ni Jehova pinaagi kang Moises, 2 Hari 18:6. Kahibulongan ang estorya nga ang Dios midugang ug napulog-lima (15) katuig sa kinabuhi ni Ezechias human siya nagkasakit, 2 Hari 20:1-6. Apan kadaghanan sa mga hari sa Juda wala magtagad sa mga pulong sa Dios ug sa mga pinadala Niya, ang mga propeta. Ang ulahi nga hari sa Juda mao si Sedecias. Siya buang-buang ug masinupakon tungod kay mirebelde siya batok sa hari sa Babilonia, 2 Hari 24:20. Si Jeremias ang propeta nagapasidaan: “Kining tibuok nga yuta mahimong usa ka biniyaan ug usa ka makahibulong, ug kining mga nasura magaalagad sa hari sa Babilonia sulod sa syetenta (70) katuig,” Jeremias 25:11.

Si Nabucodonosor ang hari sa Babilonia ug ang tibuok niyang kasundalohan miabut batok sa Jerusalem. Si hari Sedecias misulay sa pag-ikyas apan siya nadakpan. Gipatay nila ang iyang mga anak nga lalaki sa iyang atubangan ug gilugit ang iyang mga mata. Gidala siya nga ginapus sa talikala ngadto sa Babilonia, 2 Hari 25:1-7. Ato kining gitawag nga PAGESIMANG SA PAGKABIHAG didto sa atong mapa. Si Nabuzaradan, ang kapitan sa magbalantay, usa ka alagad sa hari sa Babilonia, misunog sa balay ni Jehova, sa balay sa hari, ug sa tanan nga mga balay sa Jerusalem. Ang iyang mga kasundalohan miguba sa kuta nga naglibut sa Jerusalem, 2 Hari 25:8-10. Ang mga haligi nga tumbaga, ang mga salanggaan ug ang tumbaga nga dagat-dagat nga diha sa balay ni Jehova, gipanugmok sa mga Caldeanhon ug gidala nila ang tumbaga ngadto sa Babilonia. Ila usab nga gidala ang salapi ug bulawan sa Templo, 2 Hari 25:13-21.

Human sa syetenta (70) katuig, ang Dios, sumala sa iyang saad ngadto sa mga binihag didto sa Babilonia (Jeremias 29:10), mitugot nga sila makabalik sa ilang yuta. Apan ang gingharian nawala na.

Nasabtan ba nimo unsa ka makalilisang ang muabut sa pagsupak sa Dios? Dili lamang si Solomon ug ang ubang mga hari wala magmalipayon, kondili nagdala usab sila ug mga

suliran ngadto sa tibuok nasud. Sa Roma 6:16, ang Dios nagatug-an kanato nga kita mga ulipon kaniya nga atong ginasunod. Kon kita magmasinupakon sa Pulong sa Dios, nagaalagad ba kita sa atong kaugalingon o sa Dios? Gusto sa Niya nga kita makaila Kaniya ug motuman sa maayong balita sa atong Ginoong Jesus, 2 Tesalonica 1:8. Gusto Niya nga ang mga anak magmatinumanon sa ilang mga ginikanan, Efeso 6:1-3. Gusto sa Dios nga kitang tanan magamatinumanon Kaniya ngadto sa pagkamatarung, Roma 6:16-17. Ang Dios dili motugot nga ang pagsalikway sa Iyang pinalanggang Anak magapadayon sa kahangturan. Kini karon nga dispensasyon sa grasya dili magapadayon nga walay kinutoban. Kini milungtad na sobra sa usa ka libo siyam ka gatus ug kalim-an (1950) ka mga katuigan, apan Iya kining pagatapuson ug magpadayag sa Iyang kapungot sa tanang nagasalikway ni Cristo, Salmo 2:5; 1 Tesalonica 5:3; 2 Tesalonica 1:6-9. Busa, **KARON** mao na ang **PANAHOON NGA GIKAHIMUT-AN**...**KARON** mao na ang **ADLAW SA KALUWASAN**,” (2 Corinto 6:2).

Kinsa man ang imong Agalon karon? Ang sala ba o ang pagkamatarung? Itugyan ang imong kaugalingon kang Cristo karon, kay Siya lamang ang makahatag ug tinuod nga kalipay.

SAG-ULOHON NGA BERSIKULO: “Kamong mga anak, kinahanglan managsugot kamo sa inyong mga ginikanan diha sa Ginoo, kay buhat kini nga matarung” Efeso 6:1.

PAGTULON-AN 16 – BULOHATON

Basaha ang Levitico 26:1-13, ug isulat sa ubos ang unom (6) sa mga panalangin nga gisaad sa Dios sa Israel kon sila magalakaw sa Iyang mga kabalaoranan ug magabantay sa Iyang mga kasugoan.

1. Paghatag _____
Paghatag _____
2. Pagkuha _____
Dili _____
3. Pagtalikud _____
Pagkinabuhi _____

Basaha ang Levitico 26:16, 17, 20, 22, 25, 29, 31, 33, 38 ug isulat sa ubos ang unom (6) ka mga makalilisang nga pagpanton o silot nga muabut sa Israel, kon sila magmasinupakon sa Dios ug moliso ngadto sa mga diosdios.

4. Magapadala _____
Igabutang ko ang akong nawong _____

5. Ang ilang kusog _____
Buhian _____
6. Pagdala _____
Pagtibulaag _____
7. Apan ang Dios nahigugma sa Iyang katawhan ug miingon nga Siya magahinumdom sa _____ ngadto sa ilang katigulangan. Levitico 26:45.
8. Ang Dios nagatug-an kanato nga kita _____. Roma 6:16.
9. Gusto sa Dios nga kita _____
_____. 2 Tesalonica 1:8.
10. Isulat ang Efeso 6:1: _____
